

UGAMA DAN KEWAJIPAN KEPADA MANUSIA

(III)

AGAMA YANG SEBENAR

(oleh Za‘ba)

Apakah dia agama yang sebenar dan bagaimana keadaannya?

Banyak ada agama dalam dunia ini dan tiap-tiap satu itu mengaku atau diaku oleh pengikut-pengikutnya bahawa ialah agama yang sebenar. Tiap-tiap agama itu pengikut-pengikutnya merasa syukur dan beruntung yang mereka telah dinasibkan oleh Tuhan jadi pengikut agama itu masing-masingnya. Orang Yahudi umpamanya berkata: “*Allāhādūlillāh!* Tuhan telah jadikan kita atas agama Yahudi iaitu agama yang sebenar. Yang demikian adalah sebesar-besarnya nikmat yang amat kita syukuri! Mudah-mudahan dikekalkannya kita di dalam agama ini dan ditetapkannya iman kita selama-lamanya!” Orang-orang Nasrani (Kristian) pula berkata: “*Allāhādūlillāh!* Tuhan telah kurniakan kita sebesar-besarnya nikmatnya iaitu, dijadikannya kita di dalam agama Kristian, ialah agama yang sebenar yang telah dibawakan kepada manusia oleh Kristus (*al-Masīh*) anak Tuhan sendiri! Barang kiranya ditetapkannya iman kita di dalam agama ini sehingga akhir-akhir kesudahan kita!” Maka begitulah juga ucapan pengikut-pengikut tiap-tiap agama yang lain lagi itu, dan begitulah juga kata kita orang Islam sekaliannya berkenaan dengan agama kita. Pendeknya inilah satu daripada perkara yang disebutkan oleh firman Tuhan di dalam Quran: *Kulu hizbin bimā ladaihim farihūn* - (surah al-Mu’minūn 53, surah al-Rūm 32).

Ertinya: “Tiap-tiap sekumpulan bersukacita dengan apa

yang ada pada diri mereka itu.”

Jadi kalau begitu bagaimanakah boleh dapat kita menentukan dengan benar dan adil yang manakah satu dalam bermacam-macam agama itu yang sungguh-sungguh dan sebenar agama yang sebenar?? Mustahillah semuanya agama-agama yang ada itu agama yang sebenar belaka; kerana kita ketahui baik-baik bahawa walau pun tiap-tiap satunya itu ada mengandungi sebanyak sedikit kebenaran tetapi sekalian agama itu di antara satu dengan satunya memang sangat banyak yang berselisih ajarannya dan jalan-jalan iktikadnya- bahkan bukan berselisih sahaja tetapi banyak yang berlawanan !!

Kita orang Islam mengaku sungguh ada bermacam-macam agama di dalam dunia ini dan mengaku bahawa semuanya agama-agama itu telah datang dari Tuhan belaka pada asal-asalnya dan semuanya ada mengandungi kebenaran di dalamnya banyak atau sedikit hingga sekarang ini pun. Kita mengaku tiap-tiap satunya agama-agama itu adalah agama yang sebenar belaka ada asal-asalnya tatkala mula-mula dahulu, bahkan hingga hari ini pun masih ada lagi setengah-setengah kebenarannya itu masing-masing atas kadarnya. Barang siapa yang telah menyiasat dan memerhatikan teras-teras ajaran masing-masing agama itu dengan disusun kembali hingga kepada asas dan asalnya yang jernih seberapa yang ada atau seberapa yang boleh didapati dalam kitab-kitab sucinya – barangsiapa telah berbuat demikian

nescaya akan bersetuju dengan segala pengakuan ini.

Kita mengaku juga bahawa semuanya agama-agama itu melarang daripada yang jahat dan salah dan menyuruh kepada yang baik dan betul dan semuanya pula pada asas dan umbinya adalah mempunyai ajaran yang satu dan bersamaan iaitu mengajar mengesakan Tuhan dan beribadat kepadanya dengan wasitah sembahyang, puasa, bersedekah, berbaik-baik dan tolong-menolong antara sama manusia dan lain-lain kerja kebajikan. Ya, sekurang-kurangnya begitulah keadaannya masing-masing agama itu pada mula-mulanya dahulu. Manakah agama yang tidak mengajar sekalian itu?

Sekadarkan caranya sahaja berlain-lainan: berlain-lain cara tauhidnya, berlain-lain cara sembahyangnya. Berlain-lain cara puasanya, berlain-lain cara sedekahnya atau zakatnya, dan berlain-lain pada banyak perkara lagi.

Alasannya kita memberi pengakuan-pengakuan ini ialah daripada

perkataan Tuhan dalam Quran kita sendiri. Di antaranya

kita dapati umpamanya firman Tuhan : *Wa likulli 'ummatin rasūlun:*

(surah Yūnus 47).....*wa likulli qawmin hādin:* (surah al-Rā‘d

7) Ertinya: “Dan tiap-tiap umat ada Rasulnya.” (Yakni ada pesuruh yang telah dibangkitkan kepadanya supaya menyeru mereka kepada agama Allah).... “Dan tiap-tiap kaum ada penunjuk jalannya.” (Yakni orang yang dihantar khas kepada mereka untuk menunjukkan jalan agama yang betul). Lain daripada

itu firman-Nya pula: *wa laqad ba 'athnā fi kulli umattin rasūlān ani 'budū Allāha wājtanibū al-tāghīta; faminhum man hadā Allāhu waminhum man haqqat alayhi dalālatu:* (surah al-Nahl 36),

Ertinya: “Dan sesungguhnya kami telah membangkitkan pada tiap-tiap bangsa manusia seorang utusan (Rasul) menyeru suruh mereka sekalian bertuhankan Allah dan menjauhi Tuhan-tuhan palsu. Maka di antara mereka yang mendapat seruan itu ada yang diberi pertunjuk oleh Allah kepada jalan yang betul (jalan kebenaran) dan ada pula yang tertimpa oleh sesat barat.” Kemudian firman-Nya lagi*wāin min*

ummatin illā khalā fihā nadhīrun: (surah Fātir 24), ertinya:

“Dan tidak ada satu umat jua daripada bangsa manusia melainkan telah berlaku pada mereka iaitu seorang pemberi ingat” (Iaitu utusan agama dari Tuhan, atau orang yang memanjangkan seruan utusan itu kepada mereka). Kemudian lagi firman-Nya: *walaqad arsalnā rusulān min qablika minhum man qaṣaṣnā 'alayka wa minhum man lam naqṣuṣ alayka:* (surah al-Mu’min 78), Ertinya: “Dan sesungguhnya kami telah menghantar pesuruh-pesuruh membawa agama dahulu daripada engkau (Muhammad); di antara mereka itu ada yang telah Kami ceritakan riwayatnya kepada engkau dan ada pula yang tidak Kami ceritakan kepada engkau.”Lain daripada yang telah disalinkan ini boleh didapati lagi beberapa ayat yang seakan-akan itu juga perkataan dan maksudnya di dalam Quran.

Maka sekaliannya ayat ini nyatalah menunjukkan bahawa semua

bangsa manusia yang boleh dinamakan “umat” dalam dunia ini

telah ada dihantar Tuhan Rasul menyerukan agama kepada mereka;

jugak tidak ada dihantar Rasul yang khas kepadanya sendiri,

sekurang-kurangnya seruan salah seorang Rasul yang lain

itu sampai kepada mereka. Dengan perkataan lain, tiap-tiap

umat di dalam dunia telah ada diberi Allah agama pada berlain-lain masanya

dan menerusi berlain-lain Rasul-Nya yang telah dibangkitkan pada

mereka masing-masing itu, atau yang telah disampaikan seruan-Nya pada mereka.

Sekadarkan Rasul-rasul itu setengahnya ada disebutkan

di dalam Quran dan setengahnya tidak ada disebutkan. Maka oleh

sebab banyak Rasul telah diutuskan dan tiap-tiap Rasul

itu membawa agama dengan syariat yang berlainan sedikit daripada

lainnya, maka itulah menjadikan ada bermacam-macam agama di dalam

dunia sekarang.

Barang sesuatu agama yang datang dari Allah asalnya tetaplah

mengandungi kebenaran. Oleh itu apabila sekali telah diserukan

dan diterima akan dia oleh orang-orang yang diseru, maka

tidaklah ia boleh hilang atau hapus langsung dengan begitu sahaja. Jadi itulah dia agama yang ada bermacam-macam sekarang itu dengan tidak syak sekali-kali. Agama-agama yang bermacam-macam sekarang itulah dia agama yang telah dibawakan oleh berlain-berlainan Rasul dalam dunia pada zaman-zaman sebelum Nabi Muhammad (SAW) dahulu: yang setengahnya mereka itu ada tersebut kisahnya sedikit sebanyak di dalam Quran, seperti Rasul-rasul yang membawa agama Yahudi dan agama Kristian, dan setengahnya tidak ada tersebut barang sedimikian pun, seperti yang membawa agama Hindu dan agama Buddha. Tetapi macam mana pun tentulah ada Rasul yang telah membawakan agama-agama itu sekaliannya. Sekadarkan tiap-tiap agama itu banyak daripada isinya dan keterangannya dan pemahamannya telah berubah dan bertambah pada beberapa banyak perkara daripada rupa asalnya yang mula-mula dahulu, dan setengahnya pula memang sedia kekurangan atau telah terpesong ajarannya dari mula-mula lagi.

Pendeknya diulang kembali, semua agama yang ada sekarang ini pada asal-asalnya dahulu ialah telah datang daripada Allah juga, dan oleh itu adalah semuanya itu “agama yang sebenar” belaka pada mula-mula rupanya yang bersih dahulu kala. Sekalian agama pun mulai dari yang awal pertama diberi Tuhan kepada Adam ‘alaihi al-salām’ umpamanya hingga kepada yang diberi menerusi Nabi Nūḥ, Ibrāhīm, Mūsā, ‘Isā dan lain-lain Rasul ‘alaihīm al-salām - sama ada yang tersebut dan yang tidak tersebut kisahnya di dalam Quran - adalah semuanya itu pada asal-asalnya yang bersih dahulu memang “agama yang sebenar” juga, walaupun tiada sama pada setengah-setengah perkara dengan agama Islam kita sekarang kerana berlain-lainan syariat mengikut zamannya dan hal ehwal orangnya yang dimaksudkan.

Di dalam Quran berulang-ulang kali disebut bahawa Nabi Muhammad (SAW) adalah mengikut agama neneknya Ibrahim ‘alaihīm al-salām, dan bahawa agama “baharu” yang diserukannya kepada manusia

dengan nama “Islam” ini ialah juga pada asasnya daripada agama Nabi Ibrahim dahulu kala itu, bukan lain dan lagi disebutkan juga di dalam Quran bahawa dari zaman Nabi Ibrahim itu pun lagi pengikut-pengikut agamanya itu telah disebut “Muslimin”. Ertinya orang yang menyerah diri kepada kehendak Tuhan dan kepada segala hukum perintah-Nya. Perhatilah ayat-ayat dibawah ini: *mākāna ibrāhīm yahūdiyyān walā naṣrāniyyān walakin kāna ḥanīfān muslimān wamā kāna mina al-mushrikīn* : (surah Āli ‘Imrān 66), ertinya: “Ibrahim bukanlah seorang yang beragama Yahudi dan bukan pula beragama Nasrani, tetapi adalah ia seorang yang berhati bersih dan berkelakuan betul mengikut agama betul serta menyerah diri kepada kehendak Allah: dan ia bukannya daripada orang yang menyekutukan Tuhan atau menyembah berhala.” *wamā aḥsanū dīnān mimman aslāma wajhahu lillāhi wahuwa muhsinūn wāttaba‘ millata ibrāhīma hanīfā*: (surah al-Nisā’ 125) ertinya : “Dan siapakah yang terlebih baik pada agamanya daripada orang (yakni Muhammad) yang menyerahkan tujuannya kepada Allah sambil ia berbuat baik (kepada manusia) dan mengikut akan jalan kepercayaan Nabi Ibrahim dengan hati yang betul dan bersih?” *Qul innanī hadānī rabbi ilā śirātin mustaqīm : Dīnā‘ qiyamā millati ibrāhīma hanīfān wa mākāna mina al-mushrikīn*: (surah al-An‘ām 162). Ertinya: “Katalah hai Muhammad bahwasanya aku telah ditunjukkan oleh Tuhan kepada suatu jalan yang lurus, suatu agama yang betul pendiriannya, iaitu jalan agama Nabi Ibrahim dengan bersih dan betul, dan Ibrahim bukannya daripada orang yang menyembah berhala atau menyekutukan Tuhan. *Thumma aw haynā ilayka an attabi‘ millata ibrāhīma hanīfā wamā kāna mina al-mushrikīn* : (surah al-Nahl 123). Ertinya “Kemudian kami hembuskan ke dalam hatimu (wahyukan kepadamu) perkataan: ikutilah jalan agama Nabi Ibrahim sebagai orang yang lurus dan bersih, dan Ibrahim itu bukan daripada jumlah orang yang menyekutukan Tuhan.”

.....*huwājtabākum wamā ja 'ala 'alaykum fī al-dīn*
min haraj: millata abikum ibrāhīma, huwa sammākum al-muslimīna
min qablu waft hadha.....(surah al-Hajj 78),
 ertinya “.....ia (Tuhan) telah memilih kamu,
 dan dia meletakkan di dalam agama itu barang sesuatu
 kesempitan atau kepayahan di atas kamu: (ikutilah)
 agama moyang kamu Nabi Ibrahim: ia (Allah) telah
 menamakan kamu “orang Islam” (pengikut-pengikut agama Allah)
 dari zaman dahulu itu pun dan juga pada zaman
 ini.....”

Demikianlah ayat-ayat menunjukkan bahawa agama Nabi Ibrahim dahulu kala ialah agama Islam juga pada asas dan umbinya – iaitu mengesakan Tuhan (bukan musyrikin), tunduk kepada perintah Tuhan (muslimin), surah berhati betul, lurus, bersih dan hening jernih (*hanīfā*), dan suruh berbuat baik kepada orang lain (*muhsin*). Maka keadaan demikian bukanlah terkhas dengan agama Nabi Ibrahim dahulu kala sahaja, tetapi samalah juga segala agama yang telah dibawakan ke dunia atas syariat Musa, Isa dan segala Rasul yang lain sungguhpun setengah daripada mereka itu tidak disebutkan namanya dan kisahnya di dalam Quran. Maka oleh sebab itulah kita orang Islam sekalian disuruh percaya akan segala Rasul pembawa agama sebagai satu daripada rukun iman, iaitu percaya dengan tidak membeza-bezakan mereka itu antara seorang dengan seorangnya baik pun mereka itu ada tersebut di dalam Quran atau tidak ada tersebut.

Tiap-tiap orang Islam diwajibkan mesti percaya akan segala Nabi-nabi dan Rasul-rasul itu walaupun nama dan kisah mereka tidak disebutkan di dalam Quran. Orang-orang Islam dimestikan beriman bukan sahaja akan apa yang telah diturunkan kepada Muhammad (SAW), tetapi juga akan sekalian yang telah diturunkan kepada Rasul-rasul lain dahulu daripada Muhammad dalam dunia seluruhnya. Misalnya pada permulaan surah

al – Baqarah ada tersebut bahawa di antara mereka yang dimaksudkan kitab Quran ini jadi petunjuk ialah:..... *walladhīna yu'minūna bimā unzila alayka wamā unzila min qablik:*(surah al-Baqarah 4), ertinya: “Orang-orang yang beriman akan apa-apa yang telah diturunkan Tuhan kepada Muhammad dan akan apa-apa yang telah diturunkan Tuhan kepada Rasul-rasul dahulu daripada Muhammad” dan terlebih terang daripada itu lagi: *Qūlū āmannā billāhi wamā unzila alaynā wamā unzila 'alā ibrāhīma wa ismā 'ilā waishāqa waya'qūba wa al-asbāti wamā ūtiya mūsā wa 'isā wamā ūtiya al-nabiyyūna min rabbihim lā nufarriqu bayna ahadin minhum wanaḥnu lahu muslimūn:* (surah Āli 'Imrān 84; surah al-Baqarah 136), ertinya: “Katalah hai Muhammad: Kami percaya akan Allah dan akan apa-apa juga yang telah diturunkan ke atas kami dan apa-apa juga yang telah diturunkan ke atas Ibrahim dan Ismail dan Ishak dan Yaakub dan kaum-kaum anak cucu mereka; dan (kami percaya) akan apa-apa yang telah dikurniakan kepada Musa dan Isa dan kepada segala Nabi-Nabi dari Tuhan mereka: Kami tidak membeza-bezakan di antara salah seorang pun mereka itu, dan kepadanya (Allah) kami tunduk menyerah diri.”

Maka yang disebut “segala Nabi-nabi” itu tidaklah mesti terkhas kepada Nabi-nabi yang telah dibangkitkan pada kaum Bani Israel dan Arab sahaja yang hanya terlingkung dalam jajahan Syam dan tanah Arab dan negeri-negeri yang berhampiran di sekeliling itu, tetapi mestilah termasuk bahagian-bahagian yang lain juga dalam dunia; kerana seperti yang telah kita lihat keterangannya di awal dahulu Rasul telah ada dibangkitkan Allah pada tiap-tiap bangsa yang lain juga dalam dunia ini. Yang demikian memanglah amat bersetujuan dengan akal kerana Allah Subhanahu wa Ta'ālā itu sentiasa maha adil dan saksama kepada sekalian hambanya.

Sementara itu mari kita periksa sedikit apa erti perkataan “Islam” itu. Perkataan ini daripada kalimah (sambungannya pada muka 33)

-sambungan dari muka 12

mereka menghadapi pemilihan umum yang akan menentukan menang atau terbuang. Bentuk dan corak negaranya?

Bagaimana gerangan “al-Ikhwān” di Lembah Nil,
sedang mereka dihentam habis-habisan? Bagaimana gerangan “Tanah Suci- Baitul Maqdis”
Saudara kita di sana, sedang darah mengalir lagi
-membanjir lagi!

Bagaimana gerangan “saudara Muslim di Gajah Putih
sedang mereka jauh terpencil? Dan bagaimana
Lubnan, Iraq, Yaman, Pakistan, dan kota
suci Baitullah al-Harām??

Berkatalah hatiku sendiri:

Ribuan juta umat Muhammad terpancar-pancar di dunia ini,
tetapi antara satu sama lain adalah terpisah. Sedangkan
pada mulanya mereka hanya satu!

Ribuan mereka yang miskin dan lapar pada hal mereka
dahulunya kenyang.

Ribuan mereka yang tidak berumahtangga- sedang dahulu
kota-kota dunia ini kepunyaan mereka belaka.

Ribuan mereka pula- demi dengan nasibnya tersendiri.

Dan sesaat di hari yang mulia ini mereka semua
bersembahyang, bertakbir, walaupun cara ibadat sembahyang
dan gema takbir itu hanya satu tetapi pada hakikatnya
mereka sudahlah berpecah belah.

Suara takbir tidaklah merupakan suara yang satu
lagi, tetapi berpecah-pecah dibawa angin walaupun bilangan
mereka besar, namun kekuatan tiadalah ada, besar di dalam
bilangan, kecil dalam persatuan, besar dalam namanya, tetapi
halus di dalam pengorbanannya.

Kalau yang satu ini sakit, yang satu ini tidaklah
tahu, kalau yang satu lemah, yang lain itu tidaklah ketahui,
dan kalau yang satu ini terjajah yang lain itu
menganggap sepi semata.

Mereka beragama satu, iaitu agama Islam, Tuhan

mereka pun satu iaitu: Allah, Nabi pun satu iaitu
Muhammad dan kiblat di mana mereka bersujud pun satu iaitu
Ka‘bah al-Mu‘azamah tetapi sayang mereka tidak kenal mengenali
tidak cinta mencintai, tidak mahu menghadapi dunia dan
sejarah kehidupan ini dengan satu azam dan nasib
yang sama.

Dahulu semasa mereka berdaulat persoalan hidup
mereka hanyalah satu: iaitu melaksanakan diri supaya
menjadi umat Muhammad yang kuat dan gagah perkasa di dunia
dan beroleh bahagia di akhirat. Tetapi sekarang persoalan
yang satu itu sudahlah mereka tinggalkan, mereka beraksi
sendiri, pengaruh “perseorangan” sudahlah menjalar
ke dalam jiwa mereka, sedang dahulu mereka tidak kenal
erti “perseorangan” itu.

Mereka adalah satu golongan yang banyak bilangannya di dunia
hari ini, tetapi pada hakikatnya mereka lemah, dan inilah
akibat daripada luputnya rasa persatuan dan hilangnya rasa
persaudaraan/

[Catitan: Tulisan ini ditulis semasa sekolah
saya al-Ma‘had al-Maḥmūd al-Warsitār cuti kerana bulan
Ramadhan al-Mubārak yang sekaranglah kalau diizinkan Tuhan
tersiar dalam Qalam ini]

Pesan dari sekarang

Sudah siap

‘Umar Ibnu al-Khaṭṭāb

(oleh Abdullah Basmeh)

(Penggal ketiga)

Senaskah \$1.20 Pos 10 sen

Qalam, 356-8, Geylang Rd., Singapore 14.
